



山路的光景

倚踞塔塔加鞍部入山口石碑的頭前，阮有先翁相做紀念，煞才起行。遠遠青翠的山崙重重疊疊，規天清清無風無搖，正是跔山的好流擺。無蓋闊的塗路，覘來覘去攏是菅芒、雜草，無樹蔭通遮日，一睷仔久就滿身重汗、衫褲總澹。

我看著四箍圍仔的低樹叢、花草有誠濟蟲豸、尾蝶仔、恰五花十色的野鳥咧越來越去，鏡頭就嚟嚟嚟(tshiak)翕甲袂得通煞。閤起行的時，路邊青翠的塗壁，連繼有一寡誠罕見，大細攏無全的野菇、菌叢，外形的色水，有素面的，也有豔到比花閣較嬌的。我就擰銀角仔起來跔菇柄邊做範仔，對坦邊、頂下隨張仔翕。料袂到，中意的愈來愈濟，自按呢遮蹉(thōng)遐延，強欲綴袂著陣。

沿路有足濟早都薦去的玉山杜鵑，毋過桎頂猶有結規遍青青長長的莓，應該是未開葉的新穎，牢佇枝尾戙一下戙一下。抑若當佇開粉紅仔色的，是另外一種細細蕊仔，葉較幼的懸山杜鵑。規山坪的雜草仔內底，開到上奢颺的是規簇淺紅濫白的繡線菊，頂頭有尾蝶仔恰山蜂咧舐來舐去，連我翕相的人嘛看到目睷起花，無想欲徙跂。路邊比人較懸的箭竹愈來愈旺，繼手過一枝新筍來罔哺，彼款白泔閣生甜的口味，到今予人數念袂煞。過南峰的三叉路了後，有倚一塊「鐵杉」的柴牌仔，才知影這種軀跂、粗皮的大樹仔，干焦用根盤釘佇石坎，親像咱臺灣人毋認輸的硬氣彼一樣，予我看甲攏神去。

從入山的路喺行到排雲山莊止，較大面是勻勻仔起崎的塗路，總扯(tsóng-tshé)猶有 2 米闊，較狹的是用鑿仔佇倚騰(thîng)的石壁硬拍出來的山路，就較無 1 米矣。頂頭有釘規逝的鐵鍊仔予人扞，一半搭仔較歹過路，毋過攏無蓋長，頭尾 8 公里半，碰(pōng)著 82 座鐵架鋪柴枋的棧橋，看起來攏有照起工咧保養的款，好行閣四序。上尾賸差不多 100 米遠的時陣，若毋是講會當聽著山莊厝頂的國旗仔飛到撲撲(phók-phók)叫，親像咧喝咻眾人愛閣拚落去，袂使停睷，實在講，早都跂痠手軟無想欲行矣。聽候躡(liòng)起去上尾坎，踏起去平坦門埕的彼時陣，揸(phāinn)佇肩胛頭的物件袂輸無影跡去全款，緊猛倚去桌仔邊，尻川恰行李做伙頓落去椅條，帽仔採落來，那攢那拭汗，連喘幾若个大心氣。

作者：藍春瑞

☆詞彙學習☆

【流擺】lâu-pái：時候、時機。

【蟲豸】thâng-thuā：昆蟲的通稱。

【範仔】pān-á：尺寸的標準。

【坦邊】thánn-pinn：側面。

【蹉】thōng：延宕。

【延】tshiân：遷延。

【薦去】lian--khì：枯萎、凋謝。

【戙】sìm：上下彈動。

【奢颺】tshia-iānn：鬧熱耀眼。

【舐】tsñg：（蒼蠅等昆蟲）沾食。

【白泔】péh-tsiánn：味道淡。

【神去】sîn--khì：發呆、恍惚。

【鑿仔】tsām-á：鑿子。

【一半搭仔】tsit-puānn-tah-á：幾處、一兩處。

【緊猛】kín-mé：趕緊。